



1991

18. A **Olivia Averso Pellis**
«Premi San Roc» pal 1991

Cjara Olivia,
a' son pôs ains che ti cognos
e di tè sai pôc e nuja.
Sai però che tu sês brava,
in plui ninina e simpri legra;
che tu studis cun impegn
storia, tradizions e vita
dal nestrî mont furlan.
Mi àn ancja dit, cussì di sbrîs,
che 'na dì la vôs dal cûr
ti à puartada di lontan
cu l'abit di nuvizza
su li' aghis dal Lusinz.
Che, biel che tu ninavis
cun amôr i fîs ta scuna,
tu 'zupavis i valôrs
di 'na cultura che cun grinta
tu consêvis in tal cûr.
Par chist lavôr, fat cun passion,
nô culì cun borc San Roc,
ti fasìn 'na granda fiesta
tant plui, par chê gjonda
che tu pandis fûr dai vôi
co tu nomênis li' canais
che ti sgûrlin simpri intôr.

Fortunata tû, par chel calôr
ch'a tu provis se cun traspuart
tu ju cjapis a brazzacuel.
Sù, sù fasin un brîndis
e augurìn salût, fortuna
a la studiosa di valôr.

Gurizia, ai 17 di novembar dal 1991

Ana di Fara
(Anna Bombig)